

每週經課朗誦經文（巴克禮台語漢字）2015/01/11

共同經課-1 創世記第一章一節～五節

1 源起頭，上帝創造天及地。2 地是空空混沌，深淵的面上黑暗；上帝的神運動佇水面。3 上帝講：「著有光」，就有光。4 上帝看光是好，上帝將光暗分開。5 上帝叫彼個光做「日」，叫暗做「暝」。有下昏，有早起，是頭一日。

共同經課-2 詩篇二十九篇

1 〔大衛的詩〕大權能者的子啊，恁著將榮光、氣力歸互耶和華，歸互耶和華！2 著將耶和華的名所應該得著的榮光歸互伊，用聖潔的妝飾敬拜耶和華。3 耶和華的聲佇水面；榮光的上帝起雷，耶和華佇多多水的頂面。4 耶和華的聲有大氣力；耶和華的聲滿滿威嚴。5 耶和華的聲拍折柏香樹；耶和華拍碎黎巴嫩的柏香樹。6 伊亦互伊越跳親像牛仔，互黎巴嫩及西連越跳親像野牛的子。7 耶和華的聲互火焰分叉。8 耶和華的聲振動曠野；耶和華振動加低斯的曠野。9 耶和華的聲互鹿母驚著來生子，亦互樹林的樹葉落光光。見若佇殿內者，攏講榮光。10 大水氾濫的時，耶和華坐啲做王；耶和華坐啲做王，直到永遠。11 耶和華欲賞賜氣力互伊的百姓；耶和華欲用平安賜福伊的百姓。

共同經課-3 使徒行傳十九章一節～七節

1 亞波羅佇哥林多的時，保羅經過頂勢的地方，到以弗所；抵著幾若個學生，2 問 in 講：「恁信的時曾受著聖神無？」應講：「連有聖神的賞賜抑無，阮亦未曾聽見。」3 講：「按呢，就恁受洗禮來歸佇甚麼啊？」in 就講：「約翰的洗禮。」4 保羅講：「約翰行反悔的洗禮，給百姓講著信隨尾伊來的，就是耶穌。」5 許個人聽見，就受洗禮歸佇主耶穌的名。6 保羅給 in 接手，聖神就到佇 in，in 隨時講諸個腔口，及先知的話。7 共約略十二人。

共同經課-4 馬可福音一章四節～十一節

4 約翰來，佇曠野行洗禮，傳反悔的洗禮，互人得著赦罪。5 通猶太地及耶路撒冷的眾人攏出來就近伊，認 in 的罪，佇約但河對伊受洗禮。6 此個約翰穿駱駝毛，腰纏皮帶，食草蜃及山野的蜜。7 伊傳講：「有一個比我卡有權能的，隨尾我來，就屈落來解伊的鞋帶我也袂堪得。8 我曾用水給恁行洗禮，伊欲用聖神給恁洗。」9 當諸個日，耶穌對加利利的拿撒勒來，佇約但河對約翰受洗禮。10 即時對水起來，就看見天裂開，聖神親像鴿仔，降臨佇伊的頂面。11 閣對天有聲，講：「你是我所疼的子，我歡喜你。」